

Noticia
Transparente
di Gobierno

ISLA ONLINE

Discurso di Prome Minister, Dia di Himno y Bandera, 2024

Email: IslaOnline@gobierno.aw Tel: 528-4952



EDICION SPECIAL

Himno y Bandera

PROME MINISTER
EVELYN WEVER-CROES



Gabinete Wever - Croes II



STABILIDAD
Y
PROSPERIDAD

2 0 2 4



Discurso di Prome Minister Evelyn Wever-Croes Dia di Himno y Bandera

“UN PAIS SIN
SU BANDERA
Y SIN SU
HIMNO TA
UN PAIS SIN
DESTINO”

Aruba, ya for di comienso di maart, por a sinti e emocion rond pa cu celebracion nos dia nacional, nos Dia di Himno y Bandera. 18 di maart, Aruba henter ta conmemora cu 48 aña pasa Aruba a haya su propio himno y su bandera, y cu despues Aruba a bira un pais autonomo den Reino Hulandes. Manera un costumber, e mainta aki, na Plaza Libertador Gilberto Francios ‘Betico’ Croes a tuma luga e acto protocolar na unda cu por a disfruta di diferente discurso y atraccionnan. Prome Minister Evelyn Wever-

Croes a duna un bunita discurso na unda cu el a enfatisa cu “Un pais sin su bandera y sin su himno ta un pais sin destino”.

Presente na e ocasion tawata SE Gobernador di Aruba, Señor Alfonso Boekhoudt, Presidentenan di Parlamento di Aruba y di Corsou. Miembronan di Parlamento di Aruba y di Corsou y consehalnan di Boneiro. Ministernan di Aruba y Corsou. Cuerpo Consular. Clero y demas invitadonan.



Aruba

Masha masha pabien awe cu celebracion di nos Dia di Himno y Bandera y danki pa acepta nos invitacion, pa celebra e dia importante aki cu nos. Mi kier duna un danki especial na esnan cu a bin di exterior pa ta cu nos awe.

Awe nos ta recorda cu 48 aña pasa, pa prome biaha, nos bandera a wordo hisa den stadion Guillermo Prospero Trinidad, e tempo ey conoci como Wilhelmina Stadion. Y mesora despues nos himno a wordo toca pa prome biaha.

HISTORIA

Y si nos bay un tiki den historia, 48 aña pasa, na aña 1976, Gobierno Insular di Aruba a tuma e decision cu 18 di maart ta bira nos Dia Nacional, esta nos Dia di Himno y Bandera. Pasobra Betico Croes (dfm), den cuadro di su vision pa concretisa e deseo di nos pueblo, a mira den introduccion di himno y bandera, simbolonan determinante pa logra trece union den e pueblo Arubano. Un union cu a wordo fortifica mediante e pensamiento cu tur esnan cu a nace aki y otronan cu a bin Aruba y haci e isla aki nan hogar y cu ta stima e isla aki, ta Arubiano. Y pasobra Un pais sin su bandera y sin su himno ta un pais sin destino.

Den e cuadro aki un Comision di Himno a ser institui na januari 1976. Nan tarea tabata pa conseha gobierno si mester haci e cancion popular 'Aruba Dushi Tera' himno nacional di Aruba. E cancion aki, di Padu Lampe cu composicion di Rufo Wever, tabata hopi popular caba na Aruba desde añanan 50. E comision mester a conseha gobierno tambe ki sorto di ritmo – sea marcha of wals – tin cu wordo uza. E comision den forma unanime a vota na favor di interpretacion di e himno den e bunita ritmo di wals.

Tambe a keda dicidi cu lo añadi un di tres couplet, di Hubert "Lio" Booi. E di tres couplet lo mester a expresa e deseo ferviente di nos pueblo e tempo ey, e ta bisa: Grandesa di bo pueblo ta su gran

cordialidad. Cu Dios por guia y conserva su amor pa libertad.

Riba e mesun fecha di 21 di januari 1976 Gobierno Insular di Aruba a institui tambe un Comision di Bandera cu e tarea pa organisa un concurso den pueblo pa un diseño di un bandera di Aruba. A drenta no menos cu 693 proposicion. Di esaki e comision a propone na Eilandsraad, nos bandera: Blauw – pa e color di lama, y di cielo. Dos strepi geel - oro, aloe, industria y turismo. Ariba un strea cora di 4 punta – cora pa e sanger di indian y e 4 puntanan pa e 4 idiomanan cu nos ta papia. Y rand blanco rond di e strea – pa nos playanan bunita.

Riba dia 16 di maart 1976 Eilandsraad a aproba 'Aruba Dushi Tera' como himno oficial di Aruba, y a aproba e diseño di e bandera oficial di Aruba. Y dos dia despues, esta 18 di maart 1976, e acto oficial a tuma luga, caminda a proclama oficialmente nos Himno y Bandera y esaki den presencia di miles di nos ciudadanonan.

Ami tabata un di e ciudadanonan ey, e tempo ey mi tabata un mucha di 9 aña. Mira nos bandera wordo hisa pa prome biaha, y scucha e himno pa prome biaha como himno, a haci un impresion grandi riba mi, un impresion cu ta keda cu mi cada biaha cu mi mira nos bandera wordo hisa, y scucha e himno wordo toca y canta.



BISHITA NA SCOLNAN

Pero e ta un experiencia aun mas emocionante, ora mi mira nos muchanan experiencia e mesun sensacion. Ya desde cuminsamento di e luna aki nos tur por a sinti caba e vibracion pa loke ta e celebracion di nos Dia Nacional.

E festivalnan di canto y poesia cu composicionnan y interpretacionnan sumamente bunita reflehando e amor pa nos pais; e ferianan cultural rond di henter nos isla; e marcha cultural di St Paulus School den cayanan di San Nicolas siman pasa diabierna; e manifestacion cultural ayera noch aki na Plaza Betico Croes cu un explosion di creatividad, innovacion y amor pa nos patria. Den nomber di Gobierno di Aruba mi ta gradici tur esnan cu a haCi tur e eventonan aki asina exitoso.

E aña aki, cu colega ministernan y parlamentarionan nos a bishita mas di 20 scol y nos por a mira y experiencia con nan ta prepara

pa e celebracion di nos dia di Himno y Bandera. Na forma sumamente bunita nos muchanan ta siña tocante nos himno, nos bandera, nos historia, nos cultura, y na forma hopi creativo nan mes ta participa activamente na esaki. Un biaha mas mi ta gradici nos maestronan, mayornan y alumnonan pa esaki.

Y mi por a mira pa mi mes, ki impresion hisamento di nos bandera y cantamento di nos himno tin riba nos muchanan na e scolnan cu mi a bishita, y mi por segura boso cu e impresion ey lo keda cu nan pa semper, unda cu nan bay den mundo, e amor pa Aruba lo tey.

Y ta hopi importante pa incluca den curason di nos muchanan desde jong, e amor pa nos dushi Aruba, pasobra e ora nos sa cu ora yega nan turno, nan lo cuida y stima e pida baranca aki, mes of mas hopi cu nos ta stim'e.



REFLEXION RIBA LIBERTAD

Nos himno y nos bandera ta simbolonan di nos libertad. Y esaki tabata un deseo ferviente di nos pueblo na aña 1976, ora ainda e pueblo di Aruba no tabata sa cu 10 aña despues nos lo tin nos Status Aparte. Libertad ta un palabra significante pa tur pais

na mundo cu den nan historia a biba y hiba un lucha a base di sanger, sodo y lagrima pa por a logra e ideal aki. Tin paisnan cu na e momentonan aki ta luchando pa conserva nan libertad.




REFLEXION RIBA RESILIENCIA DI NOS PUEBLO

A ruba tambe a hiba su bataya pa libertad, y esaki a ser realisa danki na e union di e pueblo Arubano. Un union caminda no ta reina division basa riba rasa, genero, color politico, districto, status economico etc. Nos a prueba cu un pueblo uni hamas por ser hundi. Y nos a demostra esaki varios biaha den historia di nos pais, desde nos Status Aparte 38 aña pasa.

Ultimo tabata e pandemia mundial Covid-19, cu tabata tin un impacto devastador pa Aruba, tipifica pa hopi perdida, perdida di bida, perdida di entrada, perdida di negoshi. Sinembargo un biaha mas, nos a uni como un solo pueblo, y lucha pa saca nos pais padilanti. Y danki na

e esfuerzo conhunto di tur ciudadano di nos pais, awe Aruba ta muestra un recuperacion impresionante, cu crecimiento economico stabil danki na crecimiento di nos turismo, cu finansas publico responsable y sostenible, cu pa di dos aña ta muestra surplusnan financiero, cu desempleo mas abou den ultimo 20 añanan.

Nos no ta ainda caminda cu nos mester ta, pero nos ta riba e bon caminda, y e tempo nos dilanti lo enfoca riba traduci e progreso aki den bienestar den cada hogar; nos lo concentra riba diversifica nos economia y nos lo enfoca riba e reformanan pa haci Aruba un pais mas fuerte y mas resiliente.





CONCLUSION

Awe riba nos Dia Nacional, ban reconfirma nos compromiso pa sigui traha, den union, pa realisa e obhetivo y causanan noble pa nos dushi Aruba.

Mi ta gradici Comision Celebracion Dianan Nacional y colega Minister di Cultura Xiomara Maduro, pa organisa e evento cultural di ayera nochi y e acto protocolar di awe mainta, y tur esnan cu a y ta haci e celebracionnan aki un exito.

Pueblo Arubano, ban celebra awe den grandi nos Dia Nacional. Hisa bo bandera cu orguyo, pasobra awe nos ta un pais autonomo den Reino Hulandes cu nos propio simbolonan di union y libertad. Pabien pueblo di Aruba cu nos gran dia! Cu Dios Todopoderoso sigui bendiciona nos pais Aruba”.









ARUBA,
18 MAART, 2024

Humno y
Bandera